

Izjava OHR-a na konferenciji za medije međunarodnih organizacija u Mostaru

Bosna i Hercegovina treba izuzetne i snažne argumente od poslovne zajednice

Prvi zamjenik Visokog predstavnika, Larry Butler, obratit će se danas poslijepodne na investicijskoj konferenciji u Sarajevu. Ambasador Butler založit će se za otvoreniju ulogu poduzetnika, poslodavaca, menadžera i članova sindikata u lobiranju za bolje poslovno okruženje u Bosni i Hercegovini.

Bolje poslovno okruženje znači više ulaganja – što znači više radnih mjesta.

Naredne sedmice Zastupnički dom Bosne i Hercegovine raspravljat će o okvirnom zakonu o dugu, što je dio sveobuhvatnog rješavanja pitanja duga kojim se predviđa dodjela kompenzacija vladinim vjerovnicima, te se pri tom omogućava da se vladine obaveze mogu izvršavati. Na ovaj način bit će uklonjene sve dosadašnje prepreke koje su štetno djelovale na unutrašnja ulaganja. Ovim će nestati i veliki i dugo prisutni znak pitanja nad javnim finansijama u BiH koji je izazivao opasnost od iznenadnih povećanja poreza u cilju isplate golemih dugova i potraživanja.

Drugi veliki korak naprijed bit će proglašenje modernizovanog Zakona o obligacijama, koji će bosanskohercegovačko poslovno okruženje odvesti u 21. stoljeće, time što, na primjer, predviđa odgovarajuće propise za trgovanje elektronskim putem kao i za međunarodne transfere novca elektronskim putem. Donošenje ovog zakona očekuje se do kraja 2005. godine.

Ambasador Butler apelirat će na poslovne ljude u Bosni i Hercegovini da se kod svojih vlada založe da se ne dozvoli da

kratkoročni politički razlozi unište ove i ostale ključne reforme koje će pomoći u otvaranju više radnih mjesta u ovoj zemlji.

Sljedeće sedmice ambassador Butler prisustvovat će sastanku koji će se u Sarajevu održati sa predstavnicima Organizacije poslodavaca Bosne i Hercegovine, Komisije Buldožer, te sindikata kako bi se ispitali načini na koje ljudi u ovim oblastima mogu ostvariti konzistentniju i plodonosniju ulogu u kreiranju politike.